

## ԳԼՈՒԽ Ը.

### ՄԱՀՄԵՏԱԿԱՆ ՇԱՐԺՈՒՄՆԵՐԸ

#### ԳՆԴ. ՀԱՍԿԵԼԸ ՀԱՅԱՍՏԱՆՈՒՄ

1919 թվականի Հայաստանի ներքին կեանքի ամենացաւոտ երևոյթը մահմետական հակապետական շարժումներն էին՝ կազմակերպւած Թիւրքիայի և Ազրբէջանի ձեռքով՝ Հայաստանի անկախութիւնը խորտակելու գիտաւորութեամբ:

Հայաստանի Հանրապետութեան գոյութեան առաջին օրից իսկ երկրի ներսը ապրող և Ազրբէջանի ու Թիւրքիայի մահմետական տարրը թշնամական դիրք բռնեց դէպի հայ պետականութիւնը: Ներքին թրջութիւնը չէր ուզում հաշտել Հայաստանի անկախութեան հետ և ձգտում էր միանալ կամ Ազրբէջանին, կամ Թիւրքիային: Ազրբէջանն ու Թիւրքիան էլ, իրենց հերթին, աշխատում էին միմեանց ձեռք մեկինել, միանալ Հայաստանի վրայով: Միութեան կամուրջ պէտք է լինէր Ղարաբաղ—Ձանդեզուր—Նախիջևան շերտը, թերևս, և Սուրմալուն ու Կարսը:

Թիւրքերի պարտութիւնից ու Կովկասից հեռանալուց յետոյ, Թիւրք հրամանատարութեան դրդումով, Հայաստանում ու Վրաստանում, ամէն տեղ — Աջարիա, Ախալցխա, Կարս, Սուրմալու, Շարուր—Նախիջևան և այլն — կազմեցին տեղական «անկախ հանրապետութիւններ» իրենց կառավարութիւններով՝ «չուրա»-ներով և սկսեցին պայքարել Հայաստանի ու Վրաստանի տիրապետութեան դէմ: Հայաստանի հողի վրա կային «Արևմտեան Կովկասի Հանրապետութիւնը» Կարսի «չուրա»-յով և Արևելեան Կովկասի կամ «Արաքսեան Հանրապետութիւնը», որի մէջ մտնում էին Սուրմալուն, Ձանդի և Վեդի բասարները, Միլին, Շարուրն ու Նախիջևանը՝ Նախիջևան կենտրոնով: Այս «հանրապետութիւններից» իւրաքանչիւրը, իր հերթին, բաժանւում էր աւելի փոքր, գաւառական միութիւնների՝ իրենց տեղական «չուրա»-ներով: Այդ «հանրապետութիւնները» պահում էին սեփական «բանակներ»՝ զինւած թիւրքական թնդանօթներով, գնդացիներով ու հրացաններով, թիւրք սպաների ու չաւուշների հրամանատարութեան տակ: Ազրբէջանը հայթայթում էր նրանց դրամը: Թիւրքիան և Ազրբէջանը ուղղութիւն էին տալիս նրանց գործունէութեան:

Հայաստանը ներսից պայթեցնելու համար մասնաւորապէս մեծ ճիգ էր թափում Ազրբէջանը, որը 1919թ. մարտին դիւանադիտական ներկայացուցի պաշտօնով Երևան ուղարկեց իր մոլեռանդ համաթիւրքապաշտ